

Il president de Agenzie regionâl per lenghe furlane, **Lorenzo Fabbro**, al spieghè i details de zornade di formazion pai insegnants ai 9 di Setembar.

» DI **CHRISTIAN ROMANINI**

La Agenzie regionâl pe lenghe furlane e à organizât par martars ai 9 di Setembar li dal palaç de Region a Udin une zornade di formazion pai insegnants di lenghe furlane.

Si scomençarà aes 9 di buinore cuntune schirie di relaziuns e si larà indevant tal dopomisdì cui laboratoris praticis.

Par cognossi cualchi detai su chest impuartant apontament e su la situazion in gjenerâl de lenghe furlane a scuele, o vin contatât Lorenzo Fabbro, president de Arlef.

**Parcè cheste zornade?**

“Par proponi un moment di riflession istituzionâl, di puestis e di formazion: un segnâl fuart al mont de scuele che, salacor, intal ultin periodi al jere stât lassât masse di bessòl”.

**Ce si spietial di cheste zornade?**

“Che si rivi a condividi un program seri e stabil par risolti lis criticitâts e tacâ a sfrutâ implem lis potenzialitâts dal insegnament plurilengâl a partî dal furlan. A saran presints dirijents e insegnants, Regjon, Arlef, Uffici scolastic, Universitât, e fintremai la rapresentante dal Miur. Une ocasion impuartante di no straçâ”.

**Ce si spietial di bande dai insegnants che a parteciparan?**

“O ringrazii fin di cumò ducj



# Segnâl fuart al mont de scuele

chei che a parteciparan. Il rûl dai insegnants in cheste partide al è fundamentâl. La seconde part de zornade par altri e sarà dedicade a laboratoris li che si frontaran cuistions une vore praticis (e o stin bielzà pensant a un altri apontament par Novembar)”.

**Cuâi sarano i obietifs di chest an scolastic?**

“L’insegnament de lenghe furlane nol à di fermâsi ancje se par lâ a regjim a volaran agns. I obietifs di rivâ chest an a son: un percors di formazion e di inzornament dai insegnants in jentrade e in servizi e la realizazion un centri di documentazion pe didatiche”.

**Cemût valutial la azion de assessore regionâl ae Istruzion Loredana Parariti?**

“La assessore, dopo vè ricevût il document de comission scuele e lis nestris puestis operativis, e à dimostrât atenzion e sensibilitât proviodint a rionzi cun risorsis adeguadis i cjapitui pal insegnament e pe formazion dai insegnants. La condivizion politiche di bande de Aministrazion regionâl e je sicuramentri impuartante, o disares fundamentâl”.

Par plui informaziuns in mert ae iniziative si pues visitâ il sît [www.arlef.it](http://www.arlef.it) o clamâ il 0432555812.

✉ [ilfriuli@ilfriuli.it](mailto:ilfriuli@ilfriuli.it)

**ARCHEOLOGIE**

**Museu paleocristian di valorizâ**

La Societât furlane di archeologie, cul patrocini de Provincie di Udin, di TurismoFVG e dal Comun di Aquilee e à organizât doi incuintris pe valorizazion dal patrimoni dal Museu paleocristian di Aquilee, pontant duncje a rindi cheste strutture part integrante di un percors storic, archeologic e turistic adun cul Museu archeologic nazionâl.

**Il prin apontament al è par Sabide ai 6 di Setembar aes 5 dopomisdì cu la conferenze “Un African a Aquilee, la lapide di Restutus e di altris cristians a Aquilee” par cure di Alessandra Gargiulo. La iniziative e permetarà di capî miôr la vite di cui che al frequentave la capitâl furlane tra il secul IV e il secul V dopo di Crist.**

Il secont incuintri al sarà Sabide ai 20 di Setembar aes 5 dopomisdì sul teme “I mosaics dal Museu paleocristian di Aquilee” par cure di Alessandra Gargiulo e di **Marta Novello**.

**SCOLTADIS DI DRIUS**

**Lavis di fûc**

Le à bussade!  
E veve i lavris come el fuc: E tremave dute.  
Amôr?  
Macchè. E veve le fiere!



*Euronews informa*

## Foncs, seconde mostre micologjiche a Udin, in spiete dal cors che al abilita a la lôr racuelte

Cont par ledròs pe seconde mostre micologjiche, immaneade de Provincie di Udin, insiem al Centri Micologic Furlan, in calendari pai 26, 27 e 28 di Setembar, li dal Ort Botanic di vie Urbanis, te zone dal Centri Studis di Udin. Ae manifestazion si podarà jentrâ a gratis, dâ une ocjade a lis cualitâts in esposizion cul jutori di esperts micolics, e ancje visitâ l’Ort botanic, ponte di diamant de Aministrazion Provincîal. I oraris di viertidure de mostre a saran chescj: vinars ai 26 di Setembar da lis 12 a lis 17, sabide ai 27 di Setembar da lis 9 a lis 17 e domenie ai 28 di Setembar da lis 9 a lis 12. La mostre è antipice di un mès la viertidure dai cors abilitants. Tant che si sa, chest gjenar di racuelte, inte nestre region e je subordenade



al possès dal patentin di abilitazion che al ven dât fûr dopo vè sostignût un exam di pueste. Par judâ la preparazion di chei che a son interessâts, la Provincie di Udin e il Centri micologic furlan a imbastissin un cors che si tignarà in Novembar: dai 4 ai 7 e dai 11 ai 14, sot sere.

Il cors “lâ par foncs” al sarà tignût sù di esperts micolics e al darà la pussibilitât, prin di dut, di cognossi l’ambient, il bosc, lis plantis, e discuvierzi la muse verzelade de nature. Il program al previôt informaziuns su la normative in vore, su lis modalitâts coretis par cjapâ sù e traspartâ i foncs, e ancje une ample analisi des principâls cualitâts di foncs che si cjatin te nestre region, un particolâr atenzion a chês che a puedin provocâ une vore di fastidis a la

salût dai consumadòrs, che a puedin puartâ a la muart, velenosis, di no fidâsi a mangiâ. Une vore interessant e je ancje la part dal cors indreçade ae tossicologie e a lis coretis technis di preparazion e conservazion dai foncs. Cognossi il mont dai foncs al è il mût miôr par tignî lontan il pericol di intosseaments. Daspò tancj agns di cors sui foncs, immaneâts de Provincie, si pues afermâ che dutis lis voltis si registrin une vore di iscriziuns: zovins, students, operaris, insegnants, pensionâts, professioniscj e feminis di famee: ducj a domandin di podè dâsi dongje e podè fâ l’exam che al abilita a la racuelte. Chei che a àn intenzion di iscrivisi al cors di Novembar a puedin fâlu daurman discjarant il modul dal sît internet de Provincie di Udin: [www.provincia.udine.it](http://www.provincia.udine.it) intes pagjinis dedicadis a la Economie-Agricoltura, o ben dal sît dal Centri Micologic Furlan [www.centromicologicofriulano.it](http://www.centromicologicofriulano.it) o pûr ritirâlu li dai uficis dal Servizi Agricoltore in vie de Prefeture, 16 a Udin.